

TELEGRAM: LA PRIME APP PAR MANDÂ MESSAÇS CHE E FEVELE IN MARILENGHE

I utents a puedin doprâle par comunicâ par furlan in maniere complete

I furlan, pe prime volte, al devente la lenghe di une app pai messaçs. E je une des plui dopradis tal mont, o ben la seconde cu la pussibilitât concrete che, tai agns che a vegnin, e deventi la prime. Cun di fat, o fevelin di **Telegram, cun passe 400 milions di utents atîfs ogni mês** e discjamade simpri di plui pes sôs carateristichis di praticitât e di riservatece (lis informazions sui utents no vegnin dadis fûr a tierçs).

Cun di plui, lis cartelis, l'archivi cloud (cun capacitât ilimitade) e il supuart pai computers, a àn rindût Telegram (doprât di passe 10 milions di utents in Italie), il strument ideâl pal lavôr di cjase e pal studi in tims di cuarentene. Un fenomen planetari, duncje, che al à cjatât cjâfs e cûrs sensibii in Friûl, intune clape di voluntaris apassionâts di cheste plateforme.

Coordenâts di Martino Buchini, a àn cjavât contat cu la **ARLeF** par vê un supuart linguistic professionâl e uficiâl, par che Telegram al rivàs a **fevelâ furlan in maniere corete**.

Chest al è stât pussibil parcè che il software, par altri, al permet di creâ une lenghe personalizade su la plateforme uficiâl di traduzion e di dividile cun altris utents, che a viodin i inzornaments in timp reâl.

«Ancje in cheste ocasion o vin la conferme che pal furlan, compagn che par dutis chês altris lenghis dal mont, no je sierade nissune strade de comunicazion – al à vût dit Eros Cisilino, president de ARLeF -. Nancje chês che a disfrutin i struments plui modernis, che a àn ancje il vantaç di jessi doprâts ogni dì di dutis lis fassis di utents e, in particolâr, dai zovins. Al è a lôr che ancje cheste volte la Agenzie e indrece la sô atenzion operative preferenziâl, stant che a presein e ur dan valôr a chescj struments, che a son une vore utii par inçressi la cognossince de lenghe furlane, ancje cul doprâju ogni dì».

In graciis di un lavôr lunc e atent di implementazion, in colaborazion cul personâl dal Sportel Regionâl pe Lenghe Furlane, a son stadis voltadis (e revisionadis) par furlan lis cuasi 15.000 stringhis dai sistemis operatîfs dulà che si pues doprâ la app: Android, iOS, Windows, MacOS e Android X.

In spiete dal ricognossiment uficiâl de lenghe furlane di bande di Telegram (procedure za inviade), che al permetarà di selezionâle tal menù des lenghis predefinidis che si cjate te aplicazion, si pues za ativâ la interface in marilenghe: al baste discjamâ la app e clicâ su chest leam: <https://t.me/setlanguage/furlan->

